

Quod Deus T. O. M. Felix Faustumque esse jubeat.

IN PERANTIQUA EBERHARDINA,

31

*Jussu & Auctoritate Gratosi Medicorum
Ordinis,*

P R A E S I D E

VIRO Nobilissimo, Amplissimo, Excellentissimo,

DN. ELIA RUDOLPHO
CAMERARIO,

Phil. & Med. Doct. ac Prax. Prof. Publ. Ordinar.
Consil. & Archiatr. Würtemberg.

*Dn. Patrono atq; Praeceptore suo omni observantia cultu de-
votissime prosequendo,*

Pro Summis & Doctoralibus in Medicina Honori-
bus Juribus ac Privilegiis legitimè obtinendis

POSITIONES HAS MEDICAS

Publico ac Solenni submittit Examinì

FERDINANDUS GOTTLIEB Schmeltz/
Lommazia Misnicus.

Ad Diem Septembr.

IN AULA NOVA.

Horis solitis,

T U B I N G A E,

Typis GEORG - HENRICI REISI, Senioris.

ANNO M DC XC.

DEO
Et
PROXIMO,
PROMOTORIBUS
Atque
PATRONIS.



Σ. Θ.

POSITIO I.

*Corpori Humano inter alias particulas
naturaliter etiam Acida insunt.*

Roscribi solet tò *Acidum* ex corpore humano, abesse jubetur tanquam hostile, inimicum ex sententia *Recentiorum Medicorum*, qui reformationem aggressi sunt Medicinæ; sed & *Veteres*, inter causas morborum per frequenter cruditatem acidam, pituitam acidam accusarunt, ipsique remedia opposuerunt, ut Reformatores hos solos fecisse dici non possit. Plurimi profectò morbi secundum suas melius explicatur causas, cum ad *Recentiorum* mentem ab acido deducuntur. Quidam autem eò usque progrediuntur, ut omnium morborum causam dicant acidum, præsertim, qui sola volatilia aut alia Exotica, quæ *Tyrannus iste La mode* præscribit, ad frequentissimum imò *universalem usum Medicinæ* trahunt. Verùm pace singulorum dicimus, non in ventriculo solum, cujus proprium liquorem, lympham fermentantem acidulam esse Quidam ipsorum concedunt, sed & in reliquo corpore, præsertim liquoribus naturalibus etiam particulas esse acidas, tum, cum in statu naturali est, non morbofo. Indicia, quæ ad detegendas corporis humani particulas adhibentur, *Autoribus Modernis* potissima sunt, ipsarum ad actiones edendas, promovendas, juvandas aptitudo: Et tam in

corpus assumi solitorum, quàm ex corpore artificiosa,
 resolutione, disgregatione, eductorum textura. Sicut
 ergò particulas tartareas, oleosas, balsamicas, alcalicas,
 mucilaginosas, roscidas, aqueas, serosas, terrestres, &c.
 adesse, actiones in corpore his propriæ docent, ita &
 dulces, amaras, insipidas, salinas, acres inesse, itidem
 quotidie hîc occurrentes actiones, quas Physiologi ex-
 plicant, evincunt. Quidni & aciditas adesse diceremus,
 cùm consideramus, etiam in statu naturali requiri de-
 bitos, non nimios spirituum motus, humorum propor-
 tionatam, ex plurium non uniformium, non alcalicarum
 solum mixtione crasin, justam consistentiam, solido-
 rum robur, fibrarum tonum nec nimis laxum nec ni-
 mis tensum, blandam hîc & ibi fermentationem (quam
 Pauci, in ventriculo præsertim, negant) nam & ad hæc
 singula, cum aliis suum symbolum conferunt particu-
 læ acidæ. Ipsis ramosioribus partim vehiculum præ-
 bent, partim viam sternunt ad ingressum in poros par-
 tiû nutriendarum faciliorem, faciunt ad applicationem
 illarum, aut ut Alii loquuntur, assimilationem, imò, an-
 non & quid ipsæ ibi deponunt? Insuper quotidie assumi-
 mus sal, alia edulia, vinum, cerevisiam, &c. quæ fer-
 mentationi, aliisque separationum modis subiecta co-
 piosas particulas aciditas promunt, assumimus panem
 fermento instructum, imò cibos & potus per se acidos.
 Quis autem evincet, acorem talem planè aut in totum
 annihilari in corpore, aut mox in alcalicam mutari tex-
 turam? Ex sanguine, ex urina, ex aliis corporis parti-
 bus artificio Chymico acidum spiritum ingeniosus Py-
 rophilus eliciet. Imò, si salis fixi quid obtinetur ex
 destillatione partium corporis humani (quod tamen i-
 gnis vi adscribunt plerique) ex ipso illo fixo sale destilla-
 tio

tionis subjecto acidus prodibit nus. Oleosas particulas in corpore nostro non negaturos Modernos, oleosi verò basin secundum plures Authores aut, si non basin, tamen ramis oleosorum facile & sæpè intricatum esse acidum, non dicemus. Ceu ergo ex diversarum aut contrariarum qualitatuum non pugna, sed amica harmonia & socio proportionato fœdere Temperamentum Quidam Veterum descripserunt: Ita & corpus nostrum ex valdè diversis particulis, sed sub amico arcto fœdere, sub proportionata mixtione, sub harmonia suavi temperatis constare, ac inter has etiam acidas comprehendere asseveramus. Ubi verò acidum blandum, mite, suave amplius non est, sed sylvestre, heterogeneous evadit, aliis prædominatur, nimis acutum est, societate ista modò laudata dissoluta, illiadem morborum prudentem Medici dextram requirentem creare, simul statuimus.

POSITIO II.

Primum ac primarium Epilepsiæ Subiectum non est Cerebrum, non Principium Nervorum, non Cor, non Ventriculus, non Fovea septi lucidi, non Glandula Pinealis, sed Membrana Nervea.

Primum & primarium Epilepsiæ Subiectum dicendum est illud, quod Principale & Universale est, illa pars Corporis, quæ in omni Epilepsia, quæ primò ante omnes alias partes ita afficitur, ut reliquæ, quæ etiam patiuntur, ab hac affectione id patiantur, in quam cum causa morbifica adæquata agit, Epilepsia producit. Diversi sunt

Medici in assignando Subjecto Epilepsiæ, hinc & sequentes potissimum nobis moveri possent *Instantia*. 1. Cerebrum & potissimum ejus membranas subjectum esse, docent principum functionum à cerebro dependentium in hoc affectu detentio, & observationes Medicorum de Epilepsiâ, ipsius læsionem, à causa sive externa sive interna factam, ordinariè insequente. *Verum* Resp. 1. Cerebri mēbranas aliquando Subjectum primum esse concedimus, ut ex Epilepsiæ Genesi, mox brevi exponenda, percipietur, sed non semper; si, verbi gratia, in pollice quis dolorem, vel aliam molestiam sentit, à vipera quis mordetur, quando infantes lac corruptum, aut lumbricos in ventriculo gestant, aut adulti venenum ibi reconditum nondum ultra progressum, tenent, aut Nervus punctus est mox præsentē Epilepsiâ, quis primum & primarium subjectum diceret Cerebrum? hinc & curatio non tam ad cerebrum, quàm ad hanc partem directâ feliciter procedit. 2. Functionum principum detentio, si adest, est inter illas læsiones, quæ primam subjecti affectionem cum reliquis insequuntur. Coafficitur cerebrum, cum detinentur illæ, sed non semper primariò. 3. Ponamus, (de quo Quidam dubitant) illud semper observari de læso cerebro, saltem sequitur, in illis casibus cerebri meninges esse subjectum primarium & primum, sed non in aliis. Quæ Responsiones, quia similia de aliis in thesi non admissis partibus, objici solent & possunt, & de illis valent. II. Epilepsiâ referri solet à Quibusdam inter affectus soporosos, cum sopor ipsam & comitetur & insequatur; Soporis autem Subjectum primum & primarium non est membrana nervea. Sed Respondetur: Sopor ille à pluribus Medicis effectus per nimium concussorium motum dissipatorum spirituum censetur: Etiam si autem
pona-

ponamus contrarium, tamen non spectat ad Essentiale Epilepsiæ, quæ Epilepsiæ. III. Membrana nervea doloris subjectum est: Verùm non omnis dolor Epilepsiæ excitat, nec omnis Epilepsia dolorem junctum habet. At Resp. Alia est causa doloris, alia Epilepsiæ. Quantos, quàm enormes sæpè ægri ad desperationem usque patiuntur dolores, à causis tam internis quam externis, ab acerrimis sæpè etiam membranas denudatas tangentibus absque ulla tamen Epilepsia, quia nempe adversitas illa, aut acrimonia, quæ improporportionatè in fibrillas agit, ipsas solvit, ipsis reagentibus, diversa est ab illa, quæ vellicat, & in illum vertumnosum motum agit. IV. Fibrillæ potius nerveæ quam membrana nervea subjectum constituent. Resp. Eadem est hæc sententia cum nostra, nam modò membrana nervea fibrillas earumque plexus seu fasciculos continet, modò ipsam fibrillæ obtegunt & amplectuntur, ex ipsis fibrillis membrana constat. Cùm autem membranam nerveam dicimus, non abstractivè illam consideramus & præcisè, solum, sed animalibus spiritibus instructam & in corpore humano vivo contentam. V. Veteres jam Medici & hætenus ferè singuli distinctionem formant Epilepsiæ in Idiopathicam & Deuteropathicam. Hæc aliud quam Cerebrum aut principium Nervorum agnoscit Subjectum, sed illa non. Resp. Si per illam quis intelligat, cum causa laceffens tangit Meninges, per hanc, cùm aliam quandam partem, poterit stare. Verùm, ceu illi Medici intelligere solent, ut in Idiopathica causam Meninges Cerebri irritantem ibi genitam ponant, in Deuteropathica ab alia parte transmissam causam, sed Epilepsiam non inducentem, nisi ad Meninges prius pervenerit, & has primariò afficiat, hoc inquam

quam sensu accipere non possumus illam distinctionem, ut ex dictis & dicendis patet. VI. Utique variæ partes causa sunt Epilepsiæ, sed non prius quàm fomes & causa efficiens mediante sanguinis circulatione cerebro communicata fuerit. Resp. Aliquando Miasma quoddam cum sanguine cerebro communicari inficias non imus, sed in omni Epilepsia id fieri imò & tum, cum ab alia parte transmittitur causa, & per hanc solam communicandi rationem contingere, dubitamus. *Gignitur* autem, quod ante brevibus exposituros nos diximus, Epilepsia, cum sub triplici consistentia acre quoddam, (nec quàm acidum, nec quàm alcalicum) adversum quoddam pungens, vellicat, laceffit, lædit in hac vel illa parte membranam nerveam facile lædi aptam, non assuetam, non sufficienter munitam, ita, ut nervosum genus insigniter irritetur, & spiritus animales non solum in ista parte, sed & in aliis, aliquando pluribus aliquando omnibus insurgant armati motu isto vertumnoso, contractorio, extensorio, vario concussorio inimicum hostile abigere, propulsare, ejicere conentur, ipsi simul in miras *ἀταξίας* species redacti, non solum quàm motum sed & quàm texturam seu crasin turbati, ut ita quævis, remotæ partis, membrana nervea tales turbas excitare, soleat, quàm cerebri aut alius partis. Motum autem istum externum varium peragunt muscoli horumque potissimum tendines & fibræ, quem motum licet tractio instar funis, aut impletio, aut distensio, aut inanitio illarum haud parum explicent, vix tamen sufficienter exhauriunt. De Præsede seu Directore systematis Nervosi circa hoc negotium occupato, doctissimè pro more scribit Celeberr. *Wepferus, Senior Hist. cicur. aquat.*

POSITIO III.

Passiones animi sæpè Causa, frequenter Productum, non rarò Remedium morborum, non nunquam Impedimentum curationis sunt.

E Magno ægrotorum numero plures sunt, qui ob passionem animi morbos contrahunt, quam qui ex Diætæ erroribus. Hæ enim non solum morbos cudunt solæ abque gulæ culpa, sed & non semel absque noxa latens, immaturum, sepultum aut sopitum in corpore vitium ex gula contractum in apicem sistunt, protrahunt, maturant, excitant & in activitatem noxiam deducunt. Impetus, intensio ob objecti vehementiam, si accedit dictis pathematibus, ut effrænes in animo ciant tumultus, ut, ceu Quidam loquitur, ebrietatem siccam referant, triplices corporis nostri partes mirè afficiunt. Est Passio, quæ spiritus ob exultationem diffundit, dispergit, est, quæ orgasmico concitat motu, alia ipsos figit, ligat, prosternit, alas ipsis demit, frænum ipsis injicit: altera inordinato ac fluctuante quatit turbine, est, quæ deprimit, coarctat, à vigore, à serenitate dejicit. Solent haud rarò affectus animi sanguinem pari cum spiritibus motuum diversitate agitare, modò stagnatione ac retardatione agglomerare, modò nimis expandere, utrumque ipsius motum variè turbare, consistentiam, crasin, texturam diversimodè immutare, ut aliquando volatilior, spirituosior justo turgat, aliquando strictiori, aliquando laxiori induatur compage, ut & cæteri succi corporis naturales plurimis turbentur modis, hîc & ibi præfixos transilient limites, Nec minus Pathemata in ipsas partes solidas, maximas, minimas, internas, externas agunt, variè lædendo, hinc &

non rarò externus vultus mentis detegit interiora, quæ lingua fucatis verbis tegere conatur, & oculorum à verbis dissensus docet, quantum lingua dissonet à mente. In specie si unius vel alius passionis energiam in producendo hoc vel illo morbo enarrare vellemus, nimis ex cresceret positionis expositio. *Sylvius* p. m. potissimum inter Practicos causarum classi inserit affectus animi, plurimis in locis *Praxeos sua* specialiter docens, quid valeat, quid agere soleat amor, odium, lætitia, tristitia, spes, desperatio, ira, metus, terror, curæ, sollicitudo, anxietas, invidia, commiseratio, &c. Febres, quæ peregrinos ex nimio Patriæ desiderio invadunt, unde nisi à spirituum & sanguinis à tali pathemate, motu ac mixtione turbata. Nec solum, quod Quidam volunt, Helvetios, sed & aliarum nationum Quosdam torquere Experientia docet. Inverso ordine, per circulum, frequenter, ipsæ Passiones animi, *Productum* morborum sunt. Plurimi enim morbi ad iram, ut & musca (secundum Germanorum adagium) in pariete disturber, proclives reddit, alii continuo mœrori subjiciunt, non pauci in curis majorem sollicitudinem, circa varia anxietatem creant. Spiritus enim ferocius moti, suo vigore sereno, alacri luciditate destituti, dispersi, turbati, sanguis turgens, & intestino, & progressivo motu vehementius jussu agitato, in fluorem propensus, a core p. n. tinctus, minus volucris, stagnans & aliis variis modis immutatus, liquores nativi degenerantes, viscera, glandulæ, aliæve partes, huic vel illi passioni magis subjiciunt, ad hunc vel illum affectum procliviores reddunt, imò ad furoris vel torporis varia genera rapiunt & detrudunt homines. Hinc & iracundiæ, & mœrori, anxietatibus opponendum peti solet Consilium, hinc & Medici felici dexteritate, quotidiana experientia teste, passiones ani-

mi

mi tollunt, non immediatè in ipsas agendo, sed fluida potissimum corporis nostri pristinae & debitae restituendo crassi, texturae ac consistentiae, non neglectis solidis, interioribus praesertim partibus. Non rarò *Remedii materia* Medico suppeditant Animi Affectus. Ira stagnantia fluida movet, & ut Observationes hinc inde loquuntur Medicæ, frigidis calorem, paralyticis vigorem, mutis sermonem, arthriticis motum restituit; nè tamen limites à divina praescriptas lege transiliat, monemus. Terror optimum in sistendo sanguine, obice ejus nimio fluxui ponendo remedium à Medicis prudenter nonnunquam in auxilium vocatur. Haemorrhagiam post sanguinem effræni motu ad multas libras jam effusum ad virium summam dejectionem continuantem, nullis remediis internis, externis, revulsionibus variis, cedentem, varia Medicorum consilia & conamina eludentem, Cardanus repressit, severo & gravi vultu juvenis illà decumbentis matri, ut tamen æger audiret, prognosticon de imminente morte ex rationibus Medicis proponens, & ut mox sacerdos ad iam jam moribundum advocaretur, monens; ex illo enim terrore & mortis timore sanguis ad omnem effluxum ineptus, in motu sufflaminabatur vitaque cum valetudine jam jam abiturienſ redibat. Confidentia ægri erga Medicum quid in feliciter actuandis medicamentis valeat, quotidie experiuntur Medici. Conscientiæ ægri tranquillitas plurimum juvat in curandis morbis. Cuivis dolori remedium patientia jure dicitur. Gaudium, Hilaritas ægri decumbentis, cum re impense desiderata potitur, plus sæpè prodest quam plura Medicamenta, imò sæpius observavit Dn. Præses, in morbis acutis & chronicis per plurimos dies medicamenta ad debitæ Methodi leges praescripta, absque optato effectu exhibita, morbo semper aucto,

aut in eodem statu manente; superveniente verò ipsi ægro grato, & læto nuncio, advenientibus Amicis, Parentibus, Sponso aut Sponsa, concesso quodam desiderio, antea denegato, advecto rerum gerendarum Nervo prius deficiente &c. subito medicamenta felicem effectum edidisse, convalescentiam manifestis se monstrasse indicibus. Nec mirum, ad convalescentiam enim, ad adversam corporis dispositionem mutandam, quid valeant spiritus, ipsorum indolem & efficaciam, accuratè tam per Rationem quàm per Experientiam scrutantibus patet, qui cum sanguine intimè nexi partim ipsius pars integrans ad sui emendationem, ad ipsius & succorum naturalium despumationem, segregationem, ad homogeneorum domesticorum conservationem, auctiorem, heterogeneorum sylvestrium expulsionem, omni nisu laboriosi contendunt. Hanc in corpore ægro actionem cuicumque adscribas principio, quo nomine alio illud insignias, per nos licebit, modò eadem nobiscum intendatur res. Tandem quales obices, quantas *remoras Medico curanti* obijciant Animi Motus in ægris, quotidianas audimus querelas. In ægro mæror nimis, impatientia, diffidentia, inobedientia, pertinacia, phantasia, indignatio, ira, invidia, &c. spiritus, sanguinem & succos corporis naturales, dirè & durè turbant, inficiunt, medicamentorum vim infringunt, noxam magis corporibus quàm salutem inferunt, dolores magis intendunt, quàm leniunt, & tandem etiam ipsorum Medicorum patientiam lædunt. *Maneat ergò Medicis alta mente repositum*, ut omni studio quantum in ipsis est contentur cognoscere, dijudicare, moderari, intra debitos coercere cancellos & in commodum vertere Medicum animi Passiones, tam in ægris, quàm in se ipsis. Arnouldus de Villa nova scribit: *Quæ Medicina plus confortans,*

tans, quàm gaudium? quæ plus calefaciens, quàm ira? quæ plus refrigerans, quàm tristitia? quæ plus nutriens, quàm bona spes? quæ plus interficiens, quàm desperatio?

POSITIO IV.

Dysenteria maligna Epidemica, in quibusdam subjectis, incruenta est.

Serpit haud rarò, præsertim æstivo & autumnali tempore, morbus gravissimus, foedissimus, *Dysenteria maligna Epidemica*, (quam sive per exulcerationem, per spasmum, sive per dejectionem describas, per nos licet.) hinc inde, grassatur latè non in castris solùm, sed & in urbibus, non in tentoriis solùm sed & in ædibus, non levem edens stragem. Oritur frequenter ab intenso nimis aëris fervore, succos corporis nativos accendente, colliquante, acuate, fundente, particulas acres à blandis solvente, ut sui juris illæ fiant, è vagina educte: à subita corporis propter externum æstum, sudore madentis denudatione, sero fuso transitum per ductulos glandularum subcutanearum quæsitum denegante, hinc in sanguinem denuò refundente, à potu vario, ad sitim à repetita modò causa ortam, fallendam, sæpiùs nimis frigido: à cibo acriore vel sua natura, vel sub corruptione ob subactionem debitam denegatam, acrimoniam contrahente, in fusionem abeunte, qualis cibus præsertim fructus horæi sunt, &c. (qui copiosius ingesti non fermentationem, ut ita loqui liceat, perfectivam, ceu cùm in macrocosmo in vinum tendunt, abeunt, sed corruptivā spiritus & humores inficientem,) Aliquando una ex his causis malum istud cudit, (nam multi absque ullis comestis talibus fructibus malo hoc corripuntur,) aliquando una & altera juncta, velut plerumque autumnali tempore, humores æstivo tempore

quasi exusti, fructus copiosi ingesti, & pororum à frigore sensim adveniente occlusio concurrunt. Quæ causæ cum multis, imò quædam omnibus communes sint, communis etiam sequitur lues. Ut ita non semper ad miasma singulare in aëre hærens recurrere opus habeamus. Nec tamen semper miasma illud, nec fomitem, qui aliquando de corpore in corpus malum transfert, omninò exesse jubemus. Comitari solent talem dysenteriam febris maligna, lipothymia, sudores frigidi, maxima virium debilitas, frigus extremorum, cardialgia vehemens, tormina dira, tenesmus intensus, sitis ingens, vigiliæ, singultus, dejectiones mucosæ, aliquando purulentæ, modò sincerae, modò mixtæ, cruentæ; & hoc ultimum *Pleriq; Practici* quasi *Pathognomicum* & discretivum ab aliis alvi fluxibus signum ponunt, ut ubi fluxus alvi cruentus abest, abesse & Dysenteriam statuant. Verùm, pace Illorum dicimus, convicti experientia, repetitis observationibus firmata, in subjectis quibusdam modò dictis, malignitatem prodentibus symptomatibus imò aliquando pejoribus, quàm ubi sanguis dejicitur, stipatam dysenteriam, etiam tùm cùm Epidemicè grassatur, esse absque effusione sanguinis, effluere autem tùm albos, flavos, virides, fuscus, variegatos diversos variè tinctos humores. Si quis autem vellet dubitare, an dysenteria nomen huic affectui conveniat, origo nominis hoc suadere aut permittere videtur. Dysenteria enim in se dicit difficultatem intestinorum. Quibusdam quidem in genere quamcunque sanguinis dejectionem notat. Sed quid vetat, indigitato fluxui hoc tribuere nomen. Celsus, & Jovianus Pontanus dysenteriam tormina verterunt. Qui verò urgent, recepto loquendi modò vocem hanc soli sanguinis dejectioni tribui, permittent tamen spero, ut dicatur & de illo fluxu,

fluxu, qui per omnia convenit cum ipso, excepta cruenta dejectione; effundens tamen serum aut succos sanguinis soboles, aut ex ipso eductos, qui eodem ut dysenteria maligna modo curatur. Rheumatismum torminalem appellat Dieterichius. Solet autem incruenta esse sub tali malignitate, dejectio, *modò*, quia serum à particulis salinis resolutis, acribus, sulphureis, orgasticis antimonii aut alius vehementis purgantis texturam redolentibus, fermentationem colliquantem inducentibus fufum propter irritationem, corrosionem, lauciationem, apertionem, imò consumptionem membrarum, fibrarum, vasorum, glandularum in intestinis excretum à minimis immixtis per intensionem corruptionem variè tinctis, flavo, viridi, &c. colore tingitur, veluti & ab antimonialibus, colocynthide & similibus vehementioribus aliquando sanguinem, aliquando non sanguinem sed talibus coloribus variegatum serum profluere deprehenditur; Sub tali autem sero non rarò latent degenerantes saliva, chylus, bilis, succus pancreaticus & liquor intestinalis; *modò*, quia sanguis ex arteriis eductus ante effluxum in pus mutatur. Nam frequenter cum sanguine pus vel parcius vel copiosius in hoc morbo excernitur. *Quidam Authorum* incruentiam etiam faciunt dysenteriam, cum mucosum intestinorum velamentum dejicitur, cum viscidum humores excernuntur, qui & in intestinis copiosiores sanguinis è vasis & intestinis educationem impediunt, cum præsertim tanta sanguinis agitatio, turbatio, fermentum valdè acre corrodens non adest. Sed talis tam periculosis ac diris symptomatibus stipata esse non solet. Nec dysenteria incruenta dici debet fluxus celiacus, cum Chylus, cui per lacteos tubulos denegatur transitus, vel purus, vel corruptus, vel aliis mixtus excernitur.

Mone.

Monemus simul, aliquando per totum morbi decursum profluvium esse incruentum, aliquando per quosdam dies, tempore, quo nonnunquam febris maligna cum symptomatibus intenditur, imò & convulsiones interdum accedunt, quæ & tùm ad se curationem trahunt; nam rarò primis diebus dysenteria, frequentius febris maligna necat.

POSITIO V.

Volatilia tam urinosa, quàm oleosa etiam externè adhibita panchresta non sunt.

U *Trag.* hîc dicta *Volatilia* frequentissimi usus hodie in Medicina sunt. Ceu autem illa hodie creberrimè exhibentur à terrestribus materialibus, minùs activis, aquosis, fixis & quibus in integris medicamentis implicantur, aliàs & irretiuntur, beneficio docti Vulcani aut Ignis Chymici liberata, sub Elixirium, Essentiarum, Tincturarum, Oleorum, Spirituum, Salium volatilium oleosorum, lixiviosorum, &c. titulo: Ita jam à Veteribus Medicis integra talia medicamenta, cultrum Chymicum nondum experta valdè frequenter in usum ducta fuere, quod Dispensatoria sub Tragearum, pulverum compositorum, specierum aromaticarum, rotularum, morsulorum, confectionum, &c. rubricis testantur; nec Iplis aquæ spirituosæ incognitæ, imò valdè familiares fuerunt. Nec absque ratione: Quot enim sunt morbi, qui natales suos debent, vel spiritibus animalibus deficientibus, vel ipsorum activitati dejectæ, effœtis viribus, motui pessundato, sufflaminato, sopito, vel vaporibus, halitibus crassis, flatibus è muco viscido excitatis, vel sanguini in quantitate in spirituascentia deficiente, non in subtilissimas particulas nobiles illos ac necessarios spiritus sublimato, grumoso, stagnanti, vapido

vido vel sero viscido lento mucoso, subsistenti, vel partibus solidis debito calore non perfusis, quâ fibrarum robur debilitatis, laxatis, quâ ductuum cavitatem angustatis? At in talibus casibus Methodi lege conveniunt Medicamenta, quæ constant ex minimis aromaticis, calidis, penetrantibus, spirituosis, oleosis, sulphureis, salinis, tenuibus, volatilibus. Magni ergò usus meritò & multa laude digna sunt talia; Velut autem utilissimorum in hoc mundo maximus est abusus, ita & in Arte Salubri; hinc ex his *polychrestis* faciunt Quidam *panchrestia*, panaceas, non nisi, in omni morbo, volatilia suadentes. Verum & inter hodiernos celebres Medicos sunt, qui in doctissimis tractatibus limites debitos usus horum figunt & angustioribus cancellis includunt. In casu specialiori restringit *Excellentissimus atque Experientissimus Dominus*, RUDOLPHUS JACOBUS CAMERARIUS, *Physic. in hac Academia Professor Ordinarius, in Disputatione Inaugurali Thes. 3.* Cum igitur internus eorum usus quodammodo coërceatur, latius tamen extenditur Externus. Hinc in quibusvis deliquiis, suffocationibus, convulsionibus, aphoniis, vertigine, apoplexia, imò & levioribus debilitatibus, anxietatibus, compressionibus, &c. singulis penè morbis, semper vertici, temporibus, pulsibus, cervici, cordis scrobiculo, umbilico, potissimum verò naribus adhiberi solent aquæ spirituosæ variæ, Imperatoris Caroli, Langii, Reginae Hungariæ, &c. balsama apoplectica, cordialia, elixiria, spiritus cephalici, catarrhales, cardiaci, pomambræ, salia volatilia oleosa, spiritus urinosi, aromatici, vel aliæ formulæ continentes volatilia modò oleosa, modò lixiviosa, modò mixta, nec absque evidenti levamine, cum commodo & refocillatione, re-

C

fectio.

fectione ægrorum. At & hæc, saltem externè adhibita, in affectibus quibusdam (ut Observationes in Praxi quotidiana testantur) non profunt, sed spiritus irritant, dissipant, resolvunt, & hinc levia deliquia, vertigines,urbationes capitis inducunt, imò non solum talia, artificiosè ex aliis educta, sed & integra, e. g. macis, gariophylli, cinamomum, ocymum, marnm, flores rosar. liliorum alb. hiacinth. tuberos. Indic. Jasmin. Hispan. &c. Plerumque *causa* hæret in ægri spirituum teneritudine, aliquando in ipsius fibrillarum membranacearum denudatione, aut mucii ipsarum infectione. Teneriores ordinario sunt spiritus vel à causis adscititiis rebus, vel non naturalibus, vel præternaturalibus. Hinc talibus præditi à levi labore sive corporis sive animi mox afficiuntur, agitantur, turbantur, ceu autem facillimè hoc contingit, ita & citò reficiuntur tales ac se recolligunt: Hinc observamus tam spasmodicos, quàm hystericas aliquando non perferre, non solum odore grato prædita, sed et foetida, lixiriosa, alia volatiliam partium sui juris factarum; spiritus namque in se jam teneriores magis resolvuntur, disperguntur, turbantur, consumuntur, & in talibus casibus externè magis reficere solent acida, aut si & hæc lædunt, vinum & similia. Fibrillæ membranaceæ præsertim narium naturaliter perfusæ sunt mucositate, madent semper; glutinosus ille succus si deest, nudas relinquens fibras, vel acrimonia quadam heterogenea infectus est, minima illa volatilium spicula disproportionata fiunt his fibrillis, mucii infecti spicula adaugent, & hinc magis lædunt quàm reficiunt. Talibus in casibus demulcentia profunt & mitigantia. Liceat occasione volatilium binis hic monere, ceu ea, quæ volatilia in igne, in aëre tamen aliquando non sunt, ita, & da-
ri

ri tenuium partium medicamenta penetrantia in corpus humanum ejusque singulas partes, quæ licet in igne & aëre volatilia non sint, tamen ob illam activitatem volatilis nomen merentur. Non autem favemus illi sententiæ, quæ per irradiationem quædam medicamenta agere dicit, talem irradiationem corporali contactui opposcentes. Nos irradiationem per minima corpuscula explicandam dicimus.

POSITIO VI.

Contrafissura Existentiæ Autopsia sufficienter non probat.

Contrafissura variis insigniri solet nominibus, ἀπήχημα resonitum, trichismum, rimam cæcam appellant, Hippocrates Συμφορὰν vocat, quod vocabulum per Infortunium vertunt. Latè accepta plures sub se comprehendit species. Nos strictè acceptam hîc intelligimus, cum nimirum parte, quæ casum, ictum, contusionem pertulit, non fractâ in opposita parte cranium frangitur cum vasorum ruptione, aliisque cranii fracturas comitari solitis symptomatibus, & interdum effusione sanguinis. De hujus existentia contentiones serram reciprocant *Authores*. *Ægineta* jam suo tempore risu eam excepit. Eam tamen dari, *Plurimi Celeberrimi tam Veteres quàm Moderni Medici ac Chirurghi* contendunt. *Affirmantes* producunt cucurbitam exsiccata, vasa vitrea ac testacea, alia parte, quàm qua percussa fuerunt, fissa ac rupta. *Negantes* maximam disparitatem objiciunt, vasa enim illa non esse corpore, quale cerebrum est, repleta, esse longè tenuiora cranio humano, esse continuum quid, cranium verò contiguum, suturis distinctum. *Regerunt Priores* maximam aëris vim in rum.

pendis corporibus solidis quotidie, præsertim hoc tempore Experimentalis, machinis pneumaticis, & tormentis bellicis demonstratam, fracturam phialarum aqua repletarum, corporum concavorum solidorum, crassorum, durorum, in dubium vocantes, an futuræ talem resonitum impedire valeant, concedentes quidem, impedire futuras fracturæ in eodem osse continuationem & protractionem, sed non fissuram in alio osse. *Paraus* inquit: *Ratum illud est, ex Hippocratis autoritate, ratione & experientia confirmatum, alia parte ictum & alia fracturam esse posse: in his præsertim, quibus aut nulla futura erunt, aut illa admodum arctæ & valido adhæsu adeò consertæ, ut vix appareant.* Cujus Partis rationes præponderent, an per illas detur, aut non detur, nunc non examinabimus. *Autopsiam* per tot Authorum tam Veterum quam Recentiorum observationes confirmatam potissimum urgent Affirmantes. Verum, ceu tantorum Virorum experientias & auctoritatem in dubium non vocamus, ita circa tales observationes omnes circumstantias, an verè contra fissura ab ictu in parte opposita facto orta fuerit, probè perpendendas censemus. Damus utique, deprehendi non rarò in diversa & opposita læsionem passæ parte tumorem, carnem corruptam, collectum pus, futuram fissam. At contigit id ex membrana inter futuras versus partem oppositam læsa, rupta, genitum est istud pus, ex sanguine è vasis meningis unius vel alterius ruptæ effuso, unde & separatio, divisio, fissura futuræ facta. Non latet nos, huic instantiæ opponere Quosdam autopsiam sive experientiam, ubi non sola vasa sed ipsum cranium in parte verè opposita ruptum fuit. Verum nec Horum fidem in dubium vocabimus, attamen potissimum perpendendum proponimus:

mus: Cùm capitis ictus, contusio fit tanta, ut autopfia postmodum fissuram in parte opposita monstret, fit id à corpore seu instrumento gravi, duro, ab impetu vehementiori, ab immittente seu impellente fortiori, unde rarò imò nunquam erecti manent à tali ictu petiti, sed prosternuntur, procidunt, & oppositam capitis partem allidunt duriori vel pavimento, vel lapidi, vel parieti, &c. Ista allisio tunc (licèt etiam nonnunquam cute integra) rupturæ seu fissuræ in altera parte causa est, non verò ictus primò factus. Nec quis dicere poterit, tale quid in istis Contrafissuræ observationibus non contigisse, nam Medicus aut Chirurgus non adstiterunt aëtui, nec æger, tùm quia iste de hoc interrogatus non fuit, aut etiamsi interrogatus, quia sensibus mox à tali casu tam internis quàm externis destitui solet, certum respondere non potuisset. Observationibus de contrafissura post casum ab alto idem, sive de allisione hic & ibi in via à supernis, sive de circumjectione in pavimento validè opponere licet. Cum ergò fissura, ruptura, seu fractura in parte opposita ab alia causa quàm casu, ictu, aut contusione facta in parte primùm tacta oriri potuerit, ipsa Contrafissuræ existentiam sufficienter non probat.

P O S I T I O VII.

Annuli Mercuriales vulgò dicti, non tales, sed Orichalcei sunt.

INter varios, quibus fugitivo Mercurio compedes injicere allaborant, modos est, cùm ipsum, additis æruginè, sale communi, in cacabo seu patella ferrea ampla cum aceto vini & aqua seu simplici, seu fabrorum,

jugiter stylo ferreo agitando, acetum & aquam subinde affundendo, coquunt per aliquod tempus, usque dum illud quod affundebatur, consumptum fuerit. Scripsit de hac coagulatione *Porta* in *Magia Naturali*; Alii parum immutant ejus modum: Variant parum quâ ingredientia & quasdam Enchireses; non autem ut productum variet. Compendium Quidam tradunt operationis ex solo vitriolo Hungarico in aqua fontana in patella ferrea soluto, quod cum Mercurio ebullire faciunt. Mercurius ita coagulatus, secundum Alios fixatus, mollis primùm, ut formis imprimi & adaptari variis valeat, post induratur instar chalybis indurati. Huic colorem aurum æmulantem imò referentem inducunt, dum ex ipso & pulvere curcumæ, Tutia Alexandr. crudæ vel lapidis calaminaris (in pondere horum aliquantum sed parum variant) faciunt S. S. S. in crucibulo, quod imposito operculo, oblutant, ignique committunt gradatim adaucto, ut tandem prunis penitus obvalletur crucibulum, follisq̃ue ope, per horas duas, tres, in A fortissimo detineatur. Aurum colore massa ista refert, è qua varia formari possunt, solent autem potissimum Annuli. Hos ex ea potissimum ratione, quod Mercurium fixatum coloratum credant, commendare solent, tanquam periaptum utilissimum, contra sanguinis impuritates, acres & mordaces defluxiones ad articulos, Podagram, Chiragram, Scabiem, præcipuè Pestem. *Caspar Hoffmannus Viadrinus* tales annulos ex Mercurio ad auri colorem sophisticato, Paracelsicos *Magnetibus* obtrudere ceu amuleta contra Epilepsiam scribit. Verùm, quando processum hunc non nudis, aut Hypothesi occæcatis, sed ratione, Chymicis Experimentis firmata illuminatis oculis scrutamur & examinamus, patet

patet sub illa seu coagulatione seu fixatione (vera & propria fixatio non est) Mercurium arripere cuprum; hinc & sola Ignis vi verum & perfectum cuprum ab illa massa separare licet. Juncta ergo sunt hæc duo Metalla, sed istis fortiori igni submissis avolat pro more Mercurius, relicto cupro, quod cum cadmia junctum fit orichalcum. *Agricola Scriptor Metallicus licet non modernus, tamen accuratus & multiplici experientia edoctus ita scribit de Natura Fossil. libr. 9. p. m. 647. Parva aris optimi fragmenta & cadmia fossilis usta & molita farinam artifices alternatim ponunt in oblongas ollas sex vel octo, quarum singula libras plus minus quinquaginta capiunt. Sunt qui ad as & cadmiam adjiciunt vitrum, ut illud facilius lique scat. Sunt qui in Cadmia fossilis locum Cadmiam fornacum substituunt. Ollas autem sic are & Cadmia repletas in fornaces sub excavata terra concameratas demittunt in ferrea bacilla, quæ in cujusq; fornacis fermè medio sunt: Ignisq; accenditur in brevibus quibusdam quasi cuniculis. Cuiq; verò fornacis parte suprema, quæ modicè extat à solo, rotundum foramen est, & saxeum operculum, quo moderantur ignem. Nam modò totum aperiunt, modò ferè totum claudunt, nunc verò aliquam ejus partem tegunt, prout res hoc postulat. Itaq; cum hæc ad horas octo, vel novem simul in acri de cocta & liquefacta fuerint, as, quamquam nondum auri colore videtur tinctum, tamen in orichalcum mutatum multo gravius factum est. Ollas, postquam id ipsum fuerit refrigeratum, ex fornace eximunt, & orichalcum favilla modò candicans, & pumicis instar cavernulis refertum denuò liquatum infundunt in receptaculum, quod est inter duas latas crustas saxeas medium. Hæ enim crustæ sic committuntur, ut ex orichalco cui jam auri color & splendor est, lamina crassa vel tennes effici possint. Quas laminas postea incudi impositas & malleo percussas perficiunt. Quæ ratio orichalci conficiendi vulgaris est. At alii tennes aris bractæas circiter*

citer digitum latas, injiciunt in catinum, in quo argentum liquari solet, ut fundi possit, ejusque exteriorem partem oblinunt argilla, cum qua mista sit ferri squama, interiorem verò melle mundissimo. Similiter singulas aris bracteolas oblinant melle, eisque inspergunt pulverem subtilissimum, qui sit ex cadmia fossilis, fecis vini sicca quam tartarum vocant, carbonum tilia æquis portionibus. Catinus autem tegitur operculo fictili, cui est foramen, in quod immittitur stilus quo liquefactum as commovetur. Sed operculum quoque, qua parte cum catino coit, argilla supra dicta oblinitur, catinus autem imponitur in fornacem talem, quali utuntur fabri monetales. Cum igitur cadmia commiscetur cum ære, primò emittitur ruber fumus: deinde partim ruber, partim caruleus, postremò luteus, qui significat misionem esse factam, atq; tum catinus ex fornace eximitur. Ex orichalca autem varia sunt opera, sed imprimis pelves, candelabra, lichnuchi, siphones, ea pluris æstimantur, quàm ærea, quod cum aris habeant duriciem, aureo placeant colore. Hæc Agricola.

Hi ergò annuli cum constant, non ex ꝑio, qui talem ignem non sustinet sed avolat, verùm ex cupro (cujus soboles ærugo, virides sive flores æris imò idem cum ipso sunt) juncto cum vel Tutia, quæ cadmia factitia est, Botryites dicta, vel lapide calaminari, qui cadmia nativa est, non Mercuriales sunt, (quod & pondus deficit) hinc Mercurialium medicamentorum viribus destituti, sed orichalcei, suppeditantes exemplum ad processus & producta per ignem accurato judicio examinanda monens, quod Veris Chymicis solenne est, & à jactantibus Chymicorum similiis Ipsos discernit.

DEO T. O. M. fit Laus, Honor
& Gloria in seculum seculi.